

समे – 12:25

<><><><><><>

Assembly

जम्मू कश्मीर विधानसभा दे पैहले पैहले इजलास दे अज्ज दुए रोज दी शुरूआत स्पीकर हुंदे आस्सेआ चेयरमैन दे पैनल दी घोषणा कन्नै होई जेहदे मगरा प्रमुख सियासी लीडरें जिंदा पिछली विधानसभा कोला लेइयै हुनै तगर दे अरसे दरान काल होइ गेआ ऐ, गी श्रद्धांजलि भेंट कीती गई। जिने प्रमुख नेताएं गी श्रद्धांजलि दित्ती गई उंदे च साबका राष्ट्रपति प्रणव मुखर्जी, साबका प्रधानमंत्री अटल बिहारी वाजपेयी ते साबका लोक सभा स्पीकर सोमनाथ चटर्जी बी शामिल हे। जम्मू कश्मीर दे जिने दिवंगत नेताएं गी श्रद्धांजलि भेंट कीती गई, उंदे च चमन लाल गुप्ता, अब्दुल रसीद डार, मदन लाल शर्मा, मोहम्मद शरीफ नियाज, सैयद मुश्ताक अहमद बुखारी, डॉ. रंधीर सिंह ते गोहवंद राम शामिल हे। असैबली दे मिंबर देवेन्द्र सिंह राणा, कृष्णा देव सेठी, हाजी अब्दुल अजीज पर्रे, मोहम्मद यासीन शाह, रछपाल सिंह, सैयद अली शाह गिलानी, मोहम्मद शफी खान ते अब्दुल गनी नसीम होरें गी बी अज्ज श्रद्धांजलि भेंट कीती गई।

<><><><><><>

PM Canada

प्रधानमंत्री नरेन्द्र मोदी होरें कनाडा च इक हिंदू मंदिर पर होए दे हमले दी सख्त लफ्जे च निंदा कीती ऐ। प्रधानमंत्री होरें सोशल मीडिया पोस्ट च आखेआ जे भारतीय राजनियके गी धमकाने दी कोशिश बी कायराना हरकत ऐ। उनें आखेआ जे हिंसा दिया ऐसियां घटना मुख्य दा संकल्प कमजोर नेई करी सकदियां। मोदी होरें कनाडा सरकार गी इस मामले च न्याह जकीनी बनाने लेई आखेआ।

<><><><><><>

US Election

अमरीका च नमें राष्ट्रपति दे चुनां लेई अज्ज मतदान होग। रिपब्लिक पार्टी दे डोनाल्ड ट्रंप ते डेमोक्रेटिक पार्टी दी कमला हैरिस बश्कार राष्ट्रपति दे औहदे लेई कड़ा मकाबला ऐ। जियां कि अमरीका च समय दे बक्ख-बक्ख जोन न, इसलेई उत्थें मतदान भारतीय समें मूजब अज्ज संजा साढ़े 5 थमां साढ़े 7 बश्कार शुरू होग ते केई मतदान केन्द्रें च कल साढ़े 5 थमां साढ़े 7 बजे तोड़ी मतदान होग। केई लोकें डाक राएं पैहले गै मतदान करी दित्ता ऐ।

<><><><><><>

Smart City

जम्मू स्मार्ट सिटी लिमिटेड नै नगरोंटा खानपुर च “वेस्ट टू वंडर पार्क” जेहदे च कूड़े ते बेकार चीजें दा इस्तेमाल करी इक पार्क बनाने दी मंजूरी देई दित्ती ऐ। एह फैसला कल इक बैठक दरान लैता गेआ जेहदे च जम्मू दे डिवीजनल कमीशनर ते जम्मू स्मार्ट सिटी लिमिटेड दे डरैक्टरें दे बोर्ड दे सदस्य शामिल हे। बैठक दरान एह जानकारी बी दित्ती गई जे तवि रिवर फ्रंट विकास परियोजना तैहत 88 फीसद शा बद्ध कम्म सबूरा करी लैता गेआ ऐ। इस सरबंघै च डिवीजनल कमीशनर होरें मुत्तलका घड़ें गी तवि दे खब्बै कंडे आला कम्म सबूरा करने दी समें सीमा 30 दिसम्बर 2024 तैह कीती ऐ जिसलै के सज्जे कंडे दे कंडे दी समें सीमा 15 जनवरी 2025 तैह कीती ऐ। बैठक च जम्मू स्मार्ट सिटी लिमिटेड दे सीईओ देवांश यादव, पुलस दे एडीजीपी आनंद जैन, जम्मू दे डिप्टी कमीशनर सनें जेएससीआई दे होर दुए मुत्तलका अफसर बी मजूद हे।

<><><><><><>

FTII

भारतीय फिल्म ते टेलीविजन संस्थान एफटीआईआई दे इक विद्यार्थी दी फिल्म Sunflowers were the First Ones to know नै ऑस्कर दी लाइव एक्शन लघु फिल्म श्रेणी आस्तै क्वालीफाई करी लैता ऐ। भारतीय लोक कथा ते परम्पराएं थमां प्रेरित, कन्नड़ भाषा दी इस फिल्म दा निदेशन चेडानानडा एस.नायक नै कीता ऐ। फिल्म नै इस ब'रे कान्स फिल्म फेस्टिवल च पैहला पुरस्कार जित्तेआ हा। माहिरें एहदी कथा वाचन शैली ते कुशल निर्देशन दी सराहना कीती। एह फिल्म दशकें गी भारतीय संस्कृति ते कथा वाचन परम्परा कन्नै जोड़दी ऐ। फिल्म दी सफलता च सूरज ठाकुर दी सिनेमाटोग्राफली, मनोज वी. दा संपादन ते अभिषेक कदम दे साउंड डिजाइन सनें प्रतिभाशाली टीम दी महारत दा बड़डा योगदान ऐ।

<><><><><><><>

Chhat Puja

बिहार ते उत्तर भारत दे केई राज्यें थमां आइयै जम्मू कश्मीर च रवा'रदे लोकें बी अज्ज छठ पूजा दा ध्यार बड़े उत्साह कन्नै मना'रदे न। चार दिनें तगर चलने आली छठ पूजा दी शुरुआत अज्ज नहाए खाए कन्नै होआ'रदी ऐ। एहदे च सूर्य भगवान हुंदी पूजा कीती जा'रदी ऐ। अज्ज ध्यार दे पैहले दिन श्रद्धालु बक्ख-बक्ख दरयायें च तलाएं ते जलशिएं च चलोबी लाइयै सूर्य देव दी पूजा अर्चना करा'रदे न। एहदे परैंत ओह प्रसाद दे रूपै च अरबा चौल, चुनां दाल ते सैली सब्जिएं दे सेवन करदे न। बिहार च बड़ी मती गिनतरी च श्रद्धालु गंगा कोसी, गंदक, बागमती ते होरने दरयाएं दे कंडे किट्ठे होंदे न। एह ध्यार 8 नवम्बर गी समाप्त होग।

<><><><><><><>